

## Wenn Männer krank send



Mir Männer send jo deutlich feinfühlicher wie d' Frau. Mei Frau dät saga: wehleidiger.

Des merkt mr

bsonders dann, wenn mr amol krank send. Wenns ons net guad isch ond mir a Erkäldong hend, mechtat mir scho gern, dass des die ganz' Welt erfährt! Ond vor allem mechtat mir net, dass jemand des ganze tragische Ausmaß von onsrer Erkrankung ronter spielt.

Männr liegat net oifach auf da Sofa odr en's Bett – Männer bahrat sich auf!

Wenn i krank ben ond a Erkäldong han, no hane no viel meh Durscht als sonscht. Bloß a Always Ultra kann dann meh Flüssigkeit aufnehma als i. Des muuß nadierlich wieder raus. Bei

mir goht des durch d' Nas. Mei Nas hot bei so ra Erkäldong emmer die bleede Angewohnheit, Marathon zu laufa. Wenn i do oin Dag en dr Sahara wär, no wär des ruck-zuck en Garda Eden.

Frau send viel leidensfähiger als Männer.

Sie machat oifach net soviel Aufhebens über a Unwohlsei.

Wenn Männer ihr „Sach“

kriega dätat, des wär a komplette Katschdrof. Sozusaga dr Mann-struale Super-Gau. Mit oifache Slipeilaga oder Binda dädät mir ons gar net abgeba. Halbe Matratza hättat mir en dr Hos! Onsr Tampons hättat mir net oifach elegant ema kloina Handtäschle - mir bräuchtat en oigana Golsack drfier!

Guad, i geb's jo zua: Mir Männer send scho a bissle hypochondrisch veranlagt. Mai Arzt sait mir äwwl i sei ganz xond. Aber Sie wissat jo: Ama

Schwoba isch erscht wohl, wenn's em net wohl isch.

Wenn mr gfrogt wie's eim ganga dät, sagat d'Schwoba jo meischt „'s goht“. Se kennta jo auch saga „guat“ oder „subbr“, aber noi, se sagat „'s goht!“



Also i schaff an meim hypochondrischa Wesa: Wenn i mor-

gens beim Zähputza Zahnfleischbluta krieg, no raff e me auf ond gang trotzdem ens Gschäft. Ha, isch des nix? Mensch ben i stolz auf mi ... Bis näggschd Woch' Ihr

Wulf Wager